

摘藻堂四庫全書薈要

史部

欽定四庫全書薈要卷五千四百六

舊五代史卷五

宋門下侍郎參知政事監修國史薛居正等撰

梁書第五

太祖紀五

開平三年九月癸巳朔御崇勲殿宴羣臣文武百官賜  
張宗奭楊師厚白綾各三百匹銀鞍轡馬丁酉上幸崇  
政院宴內臣賜院使敬翔直學士李班等繪綵有差以

門下侍郎平章事薛貽矩判建昌宮事兼延資庫使制  
內外使臣復命未見便歸私第者朝廷命使臣下奉行  
惟於辭見之儀合守敬恭之道近者凡差出使往復皆  
越常規或已辭而尚在本家或未見而先歸私第但從  
已便莫稟王程在禮敬而殊乖置典章而私舉宜令御  
史臺別具條流事件具黜罰等奏聞庚子殿直王唐福  
自襄城走馬以天軍勝捷逆將李洪歸降事上聞賜唐  
福絹銀有加宰臣百官上表稱賀壬寅開封府虞候李

繼業齋襄州都指揮使陳暉奏狀以今月五日殺戮逆

黨千人並生擒都指揮使傅霸以下節級共五百人收

復襄州人戶歸業

通鑑八月陳暉軍至襄州李洪逆戰大敗王求死九月丁酉拔其城斬叛

兵千人執李洪揚虔等送洛陽斬之

癸卯帝御文明殿以收復襄漢宰臣

以下稱賀辛亥侍中韓建罷守太保左僕射同平章事

楊涉罷守本官以尺常卿趙光逢為中書侍郎平章事

翰林學士奉旨工部侍郎知制誥杜曉為尚書戶部侍

郎平章事詔曰秋冬之際陰雨相仍所司擇日拜郊或

慮臨時妨事宜令別更擇日奏聞是月禮儀使奏據所  
司擇十月二日祀圜邱今參詳十月十七日以後入十  
一月節十一月二日冬至一陽生之辰宜行親告之禮  
從之河中奏准宣詔使有銅牌者所至即易騎以遣十  
月癸未大明節帝御文明殿設齋僧道召宰臣翰林學  
士預之諸道節度刺史及內外諸司使咸有進獻詔以  
寇盜未平凡諸給過所並令司門郎中員外郎出給以杜  
姦詐十一月癸巳朔帝齋於內殿不視朝甲午日長至

五更一點自大內出於文明殿受宰臣以下起居自五  
鳳樓出南郊左右金吾太常兵部等司儀仗法駕鹵簿  
及左右內直控鶴等引從赴壇文武百官太保韓建以  
下班以候帝升壇告謝司天臺奏冬至日自夜半後祥  
風微扇帝座澄明至曉黃雲捧日丙申畋于上東門外  
戊戌制曰夫嚴親報本所以通神明流澤覃休所以惠  
黎庶斯蓋邦家不易之道皇王自昔之規敢敷大猷茲  
惟古義粵朕受命於今三年何曾不寅畏晨興焦勞夕

惕師唐虞之典上則于乾功挹殷夏之源下涵于民極  
欲使萬方有裕六辨無愆然而志有所未孚理有所未  
達致奸宄作釁旱霖為災驕將守邊擁牙旗而背義積  
陰馭氣陵玉燭以干和載攷休徵式昭至警朕是以仰  
高俯厚靡惜于責躬履薄臨淵冀昭于玄覽競競慄慄  
夙夜匪寧及夫動干戈而必契靈誅陳犧齋而克章善  
應苟非天垂丕佑神贊殊休則安可致夷兇渠就不戰  
之功變沴戾氣作有年之慶況靈旗北指喪犬羊於亂

轍之間飛騎西臨下廊翟若走丸之易息一隅之煙燧

復千里之封疆而又掃蕩左馮討除峴首故得外戎內

夏益知天命之攸歸喙息歧行共識皇基之永固仰懷

昭應欲報無階爰因南至之辰親展園丘之禮茲惟大

慶必及下民乃宏渙汗之私以錫疲羸之幸所冀漸增

蘇息亟致和平噫朕自臨御以來歲時尚邇氛昏未殄

討伐猶頻甲兵須議於餽糧飛輓頻勞於編戶事非獲

已慮若納隍宜所在長吏倍切撫綏明加勉諭每官中



抽差徭役禁猾吏廣歛貪求免至流散靡依凋弊不濟  
宜令河南府開封府及諸道觀察使切如鈐轄刺史縣  
令不得因緣賦歛分外擾人凡關庶獄每望輕刑只候  
纔罷用軍必當便議優給德音節文內有未該者宜令  
所司類例條件奏聞己亥以羅周翰為天雄軍節度副  
使知府事從鄴王紹威請也辛丑幸穀水戊午御文明  
殿冊太傅張宗奭太保韓建受冊畢金吾仗引昇輅車  
儀仗導謁太廟訖赴尚書省上幸榆林坡閱兵教諸都

馬步兵敕改乾文院為文思院行殿為興宅殿毬塲為  
興安毬塲又改弓箭庫殿為宣武殿靈州奏鳳翔賊將  
劉知俊率邠岐秦涇之師侵迫州城帝遣陝州康懷英  
華州寇彥卿率兵攻迫邠寧以緩朔方之寇

五代春秋  
十一月秦

人來侵靈州陝州康懷英侵秦克寧慶  
衍三州秦人來襲懷英兵敗於昇平

十二月乙丑臘

較獵於甘泉驛以蒲州肇迹之地且因經畧廊延於是  
巡幸數月暇日游豫至焦梨店頗述前事念王重榮舊  
功下詔褒獎而封崇之國子監奏創造文宣王廟仍請

率在朝及天下現任官僚俸錢每貫每月尅一十五文  
充土木之植允之是歲以所率官僚俸錢修文宣王廟  
福建節度使王審知奏捨錢造寺一所請賜寺額勅名  
大梁萬歲之寺仍許度僧四十九人贈牢牆使王仁嗣  
司空故同州押衙史肇右僕射押衙王彥洪高漢詮丘  
奉言仇瓊並刑部尚書王筠御史司憲初劉知俊將叛謀  
會諸將詢所宜仁嗣等持正不撓悉罹其酷至是褒  
贈之劉守光上言于薊州西與兄守文戰生擒守文

開平四年正月壬辰朔帝御朝元殿受百官稱賀用禮樂也勅公事難于稽遲居處悉皆遙遠其逐日當直中書舍人及吏部司封知印郎官少府監及篆印文兼書寫告身人吏等並宜輪次于中書側近宿止乙未帝出師子門至榆林坡下閱教士寅辛保寧毬塲錫宴宰臣及文武百官賜宰臣張宗奭已下分物有加賜廣王分物賜湖南開元寺禪長老可復號惠光大師仍賜紫衣二月乙丑辛甘水亭出師子門幸榆林東北坡教諸軍

兵事賜潞州投歸軍使張行恭錦服銀帶並食戊辰宴  
于金鑾殿甲戌以春時無事頻命宰臣及勲戚宴于河  
南府池亭辛巳揚師厚赴鎮于陝寒食假諸道節度使  
郡守勲臣競以春服賀又連清明宴以鞍轡馬及金銀  
器羅錦進者迨千萬乃御宣威殿宴宰臣及文武官四  
品已上巳丑出光政門至穀水觀麥三月壬辰幸崇政  
院宴勲臣己亥幸天驥院宴侍臣壬寅幸甘水亭宴宰  
臣勲戚翰林學士辛亥宴宰臣于內殿丙辰于興安毬

塲大饗六軍樂春時也四月壬戌詔曰追養以祿王者  
推歸厚之恩欲靜而風人子抱終身之感其以刑部尚

書致仕張策及五品四品常參官二十二人先世各追  
贈一等乙丑宴崇政院帝在藩及踐阼勵精求理深戒

逸樂未嘗命堂上歌舞是日止令內妓升階擊鼓弄曲

甚懽至午而罷丁卯宋州節度使衡王友諒進瑞麥一

莖三穗

通鑑友諒獻瑞麥帝曰豐年為上瑞今宋州大水安用此為詔除本縣令名遣使詰責友諒

丙戌幸建春門閱新樓至七里屯觀麥召從官食於樓

河南張昌孫及蒲同主事吏賜物各有差帝過朝邑見鎮將位在縣令上問左右或對曰宿官秩高帝曰令長字人也鎮使捕盜耳且鎮將多是邑民柰何得居民父母上是無禮也至是勅天下鎮使官秩無高卑位在邑令下葉縣鎮遏使馮德武於蔡州西平縣界殺戮山賊擒首領張漬等七人以獻鎮海軍節度使錢鏐擊高澧於湖州大敗之梟夷擒殺萬人拔其郡湖州平先是澧以州叛入淮南故詔鏐討之也五月己丑朔以連雨不

止至壬辰御文明殿命宰臣分拜祠廟自朔旦至癸巳  
內外以午日奉獻巨萬計馬三千蹄餘稱是復相率助  
修內壘甲辰詔曰竒邪亂正假偽奪真旣刑典之不容  
宜犯違而勿赦應東西兩京及諸道州府創造假犀玉  
真珠腰帶壁珥並諸色售用等一切禁斷不得輒更造  
作如公私人家先已有者所在送納長吏對面毀棄如  
行勅後有人故違必當極法仍委所在州府差人檢察  
收捕明行處斷魏博節度使守太師兼中書令鄴王羅



紹威薨帝哀慟曰天不使我一海內何奪忠臣之速也  
詔贈尚書令六月己未朔詔軍鎮勿起土功七月壬子  
宴宰臣河南尹翰林學士兩街使于甘水亭丙辰宴羣  
臣于宣威殿賜物有差劉知俊攻逼夏州

通鑑七月岐王與汾涇二

帥各遣使告晉請合兵攻定難節度使李仁福晉王以  
遣振武節度使周德威將兵會之合五萬衆圍夏州

宣化軍留後李思安為東北面行營都指揮使陝州節度  
使楊師厚為西路行營招討使福州貢方物獻桐皮扇  
廣州貢犀玉獻舶上蕃徽水時陳許汝蔡潁五州境內

有蜚為災俄而許州上言有野禽羣飛蔽空旬日之間食殍皆盡是歲乃大有秋八月車駕西征己巳次陝府是時憫雨且命宰臣從官分禱靈迹日中而雨翼日止帝大悅辛未老人星見是日晏本府節度使楊師厚及扈從官於行宮賜師厚帛千匹仍授西路行營招討使丙子宴文武從官軍使已下設龜茲樂賜物有差九月丁亥朔命宰臣于競赴西都祀昊天上帝於圜丘甲午至西京下詔曰朕聞歷代帝王首推堯舜為人父母

孰比禹湯睿謀高出於古先聖德普聞於天下尚或卑  
躬待士屈已求賢俯仰星雲慮一民之遺逸網羅巖穴  
恐片善之韜藏延爵祿以徵求設丹青而訪召使其為  
政樂在進賢蓋繇國有萬機朝稱百揆非才不治得士  
則昌自朕光宅中區迄今三載宵分輟寐日旰忘餐思  
共力於廟謀庶永清於王道而乃朝廷之內或未盡於  
昌言軍旅之間亦罕聞於奇策眷言方岳下及山林豈  
無英奇副我延佇諸道都督觀察防禦使等或勲高翊

世或才號知人必於塗巷之賢備察芻蕘之士詔到可  
精搜郡邑博訪賢良諭之以千載一時約之以高官美  
秩諒無求備惟在得人如有卓犖不羈沈潛自負通霸  
王之上略達文武之大綱究古今刑政之源識禮樂質  
文之變朕則待之不次委以非常用佐經綸豈勞階級  
如或一言拔俗一事出羣亦當舍短從長隨才授任大  
小方圓之器寧限九流溫良恭儉之人難誣十室勉思  
薦舉勿至因循俟爾發揚慰予翹渴仍從別勅處分辛

丑以久雨命宰臣薛貽矩崇定鼎門趙光逢祠嵩岳勅  
魏博管内刺史比來州務竝委督郵遂使曹官擅其威  
權州牧同於閑冗俾循通制宜塞異端並依河南諸州  
例刺史得以專達壬寅頒奪馬令先是王師擊賊獲馬  
多上獻至是盡止之蓋欲邀其奮擊之功也乙巳王師  
敗蕃寇於夏州初劉知俊誘沙陀振武賊帥周德威涇  
原賊帥李繼鸞合步騎五萬大舉欲俯拾夏臺節度使  
李仁福兵力俱乏以急來告先是供奉官張漢攻宣諭

在壁國禮使杜廷隱賜幣於夏及石堡寨聞賊至以防  
卒三百人馳入州既而外兵圍合廷隱漢玫與指揮使  
張初李君用率州民防卒與仁福部分固守晝夜戮力  
踰月及郿延援至大軍奮擊敗之河東郿岐賊分路逃

遁夏州圍解

通鑑甲申遣夾馬指揮使李遇劉綰自郿  
延趨銀夏李遇等至夏州岐晉兵皆解去

丙午詔曰劉知俊貴為方伯尊極郡王而乃背誕朝恩  
竄投賊壘固神人之共怒諒天地所不容雖命討除尚  
稽擒戮宜懸爵賞以大功名必有忠貞咸思憤發有生

擒劉知俊者賞錢千萬授節度使首級次之得孟審登  
者錢百萬除刺史得孫亢卓環劉儒張鄴等賞有差乙  
卯宴會羣臣於宣威殿

舊五代史卷五

舊五代史卷五攷證

梁太祖紀五襄州都指揮使陳暉○案歐陽史作行營  
招討使左衛上將軍陳暉

復收襄州人戶歸業○案歐陽史云九月壬寅陳暉克  
襄州據是書則陳暉以壬寅奏捷非以是日克城攷  
通鑑克城繫九月丁酉與是書今月五日正合歐陽  
史蓋據奏捷之日而書之耳

以收復襄漢受宰臣以下稱賀○案襄漢下原本衍收



字今刪

并令司門郎中員外郎○司門原本作司關考五代會  
要有司門郎中今改正

故得外戎內夏○內夏原本訛作內憂今據文改正  
辛亥宴宰臣于內殿○案原本脫宴字今增入

鎮海軍節度使錢鏐擊高澧于湖州大敗之○案九國  
志高澧以三年十月叛四年二月奔吳是書繫于四  
月蓋以奏聞之月為據

劉知俊攻逼夏州○案五代春秋八月晉人秦人侵夏  
州與是書及通鑑異

甲午至西京○案五代春秋作九月己丑帝還西都歐  
陽史同通鑑作己丑上發陝甲午至洛陽

國禮使杜廷隱○廷隱原本作定隱下文仍作廷隱今  
據九國志改正



欽定四庫全書薈要卷五千四百七

舊五代史卷六

宋門下侍郎參知政事監修國史薛居正等撰

梁書第六

太祖紀六

開平四年十月乙亥東京博王友文入覲召之也己卯  
以新修天驥院開宴落成內外並獻馬而魏博進絹四  
萬足為駟價壬午以冬設禁軍幸興安鞠場召文武百

官宴幸開化大閱軍實十一月丁亥朔幸廣王第作樂  
辛卯宴文武四品已上于宣威殿庚戌幸左龍虎軍宴  
羣臣甲寅幸右龍虎軍宴羣臣戌戌詔曰自朔至今暴  
風未息諒惟不德致此咎徵皇天動威罔敢不懼宜徧  
命祈禱副朕意焉差官分往祠所止風已亥日南至帝  
被袞冕御朝元殿列細仗奏樂于庭羣臣稱賀帝畋于  
伊水乙巳詔曰闕防者所以譏異服察異言也况天下  
未息兵民多姦改形易衣覘我戎事比者有諜皆以詐

敗而未嘗罪所過地叛將逃卒竊其妻孥而影附使者  
亦未嘗詰其所經今海內未同而緩法弛禁非所以息  
姦詐止奔亡也應在京諸司不得擅給公驗如有出外  
須執憑繇者其司門過所先須經中書門下點檢宜委  
宰臣趙光逢專判出給俾繇顯重冀絕姦源仍下兩京  
河陽及六軍諸衛御史臺各加鈐轄公私行李復不得  
帶挾家口向西其襄鄧鄜延等道並同處分以寧國軍  
節度使王景仁充北面行營都招討使潞州副招討使

韓勅為副相州刺史李思安為先鋒使時鎮州王鎔定

州王處直叛結連晉人故遣將討之

五代會要十一月十四日司天奏月

蝕不宜用兵時王景仁方總大軍北向追之不及至五年正月二日果為後唐莊宗大敗于柏鄉

十二

月辛酉宴文武四品已上于宣威殿親閱禁軍命格闕

于教馬亭已已詔曰滑宋輝毫等州水滂敗傷人戶愁

嘆朕為民父母良用痛心其令本州分等級賑貸所在

長吏監臨周給務令存濟壬辰賑貸東郡畿內如宋滑

制

乾化元年正月丙戌朔日有蝕之帝素服避殿百官守司以恭天事明復而止制曰兩漢以來日蝕地震百官各上封事指陳得失蓋欲周知時病盡達物情用緝國章以奉天誠朕每思逆耳固忌觸鱗將洽政經庶開言路況茲謫見當有咎徵其在列辟羣臣危言正諫極萬邦之利害致六合之殷昌毗予一人永建皇極二日日旁有侵氣向背若環耳崇政使敬翔望之曰兵可憂矣帝為之盱食是日果為晉軍及鎮定之師所敗都將十



餘人被擒餘衆奔潰庚寅制曰扈氏不恭固難去戰鬼  
方未服尚或勞師其蟻聚餘妖狐鳴醜類棄天常而拒  
命據地險以偷生言事討除將期戡定問罪止誅于元  
惡挺災可憫于遺黎每念傷痍良深愧歎應天兵所至  
之地宜令將帥節級嚴戒軍伍不得焚燒廬舍開發丘  
壠毀廢農桑驅掠士女使其背叛之俗知予弔伐之心  
又制曰戎機方切國用未殷養兵須藉于賦租稅粟尚  
煩于力役所在長吏不得因緣徵發自務貪求苟有故

違必行重典立法垂制詳刑定科傳之無窮守而勿失  
中書門下所奏新定格式律令已頒下中外各委所在  
長吏切務遵行盡革煩苛皆除枉濫用副哀矜之旨無  
違欽恤之言詔徵陝州鎮國軍節度使楊師厚至京見  
于崇勲殿帝指授方略依前充北面都招討使恩賚甚  
厚使督軍進發五代會要二月晉師侵魏州楊師厚帥師援邢州晉人還師二月丙  
辰朔帝御文明殿羣臣入閣以蔡州順化軍指揮使王  
存儼權知軍州事蔡人久習叛逆刺史張慎思又哀歛

無狀帝追愼思至京而久未命代右廂指揮使劉行琮  
乘虛作亂因縱火驅擁為渡淮計存儼誅行琮而撫遏  
其衆都將鄭遵與其下奉存儼為主而以衆情馳奏時  
東京留守博王友文不先請遂討其亂兵至鄆陵上聞  
之曰誅行琮功也然存儼方懼若臨之以兵蔡必速飛  
矣遂馳使還軍而擢授存儼蔡人安之壬戌詔曰東京  
舊邦久不巡幸宜以今月九日幸東都扈從文武官委  
中書門下量閑劇處分宰臣上言曰龍興天府久望法

駕但陛下始康愈未宜涉寒願少留清蹕從之

五代會要二月

敕食人之食者憂人之事況丞相尊位參決大政而堂封未給且無餐錢朕甚愧之宜令食萬錢之半

甲

子幸曜村民舍閱農事庚午幸白馬坡詔金吾大將軍待制官各奏事武安軍節度使馬殷進呈虔州刺史盧延昌歲表虔州本支郡也兵甚銳自得韶州益强大昇為百勝軍使始洪州之陷盧光稠願收復使府立功自效上因兼授江西觀察留後光稠卒復命延昌領州事方伯亦頗慰薦楊渭遣人偽署爵秩延昌佯受官牒禮

遣其使因湖南自表其事曰郡小寇迫欲緩其奸謀且  
開導貢路非敢貳也以其偽制來自陳上覽奏曰我方  
有北事不可不甚加撫卹尋兼授鎮南將軍節度使觀  
察留後命使慰勞

九國志盧延昌歸命  
于吳偽乞命于梁

三月辛卯以久

旱令宰臣分禱靈迹翼日大澍雨丙申幸甘水亭召宰  
臣翰林學士尚書侍郎孔續已下八人扈從宴樂甚歡  
戊戌幸右龍虎軍召文武官四品已上宴于新殿甲辰  
幸左龍虎軍新殿宴文武官四品已上四月丁卯幸龍

虎門召宰臣學士金吾上將軍大將軍侍宴廣化寺壬申契丹遣使來貢丁丑幸宣威殿宴文武官四品已上及軍使蕃客己卯又幸左龍虎軍宴羣臣詔曰邠岐未滅闕隴多虞宜擇親賢總茲戎任應闕西同雍華廊延夏等六道兵馬并委冀王收管指揮凡有抽差先申西面都招討使仍別奏聞庶合機權以寧邊鄙五月甲申朔帝被冕旒御朝元殿視朝仗衛如式制改開平五年為乾化元年大赦天下詔方伯州牧近未加恩者並遷

爵秩復大賚軍旅普宴于宣威殿賜帛各有差制封延  
州節度使高萬興為渤海郡王諸道節度使錢鏐張宗  
奭馬殷王審知劉隱各賜一子六品正員官高季昌賜  
一子八品正員官賀德倫賜一子九品正員官癸巳觀  
稼于伊水登建春門幸會節坊張宗奭私第臨亭臯視  
物色賞賜甚厚詔左銀臺門朝參諸司使庫使已下不  
得帶從人入城親王許一二人執條床手簡餘悉止門  
外關入者抵律閤守不禁與所犯同先時門通內無門

籍且多勲戚車騎衆者尤不敢呵察至是有以客星凌  
犯上言者遂令止隔海清軍節度使守侍中兼中書令  
劉隱薨輟朝三日百僚詣閣門奉慰六月乙卯命北面  
都招討使鎮國軍節度使楊師厚出屯邢洺丁巳鎮定  
鈔我湯陰詔曰常山背義易水效尤誘其蕃戎動我邊  
鄙南侵相魏東出邢洺是用遣將徂征為人除害但初  
頒赦令不欲食言宥而伐之諒非獲已况聞謀始不自  
帥臣致此厲階並由姦佞密通人使潛結沙陀既懼罪



誅乃生離叛今雖行討伐已舉師徒亦開詔諭之門不阻歸降之路矧又王鎔處直未曾削爵除名若翻然改圖不遠而復必仍舊貫當保全功如有率衆向明拔州效順亦行殊賞冀徇來情免令受弊于疲民用示惟新于汚俗宜令行營都招討使及陳暉軍前准此勅文散加招諭將安衆懼特舉明恩鎮州只罪李弘規一人其餘一切不問詔修天宮佛寺又湖南奏潭州僧法思桂州僧歸真並乞賜紫衣從之七月帝不豫稍厭秋暑自

辛丑幸會節坊張宗奭私第宰臣視事於歸仁亭子崇政  
使內諸司及翰林院並止于河南令廨署至甲辰復歸  
大內八月庚申幸保寧殿閱天興控鶴兵事軍使將校  
各有賜癸亥老人星見戊辰幸故上陽宮至於榆林觀  
稼丙子閱四蕃將軍屯衛兵士於天津橋南至龍門廣  
化寺戊寅幸興安鞠場大教閱帝自指麾無不踊抃坐  
作進退聲振宮掖右神武統軍丁審衡對御以紅帛囊  
劍擬乘輿物帝曰宿將也恕之以劉重霸代其任九月

辛巳朔帝御文明殿羣臣入閣刑法待制官各奏事己丑宴羣臣于興安殿庚子親御六師次于河陽甲辰至于衛州乙巳至于宜溝幸民劉達墅丙午至相州賞左親騎指揮使張仙右雲騎指揮使宋鐸嘗身先陷陣各賜帛十月辛亥朔駐蹕于相州宰臣洎文武從官並詣行宮起居戶部郎中孔昌序齋留都百官冬朔起居表至自西京諸道節度使刺史諸蕃府留後各以冬朔起居表來上制以郢王友珪充控鶴指揮使諸軍都虞候

閻寶為御營使有司以立冬太廟薦享上言詔丞相杜  
曉赴西都攝祭行事癸丑閱武于州闥之南樓左龍驤  
都教練使鄧季筠魏博為軍都指揮使何令稠右廂馬  
軍都指揮使陳令勲以部下馬瘦並腰斬于軍門甲寅  
將以其夕幸魏縣命閤門使李郁報宰臣兼勅内外是  
夜車駕發轍于都署乙卯次洹水丙辰至魏縣先鋒將  
黃文靖伏諫己未帝御朝元門以回鶻吐蕃二大國首  
領入覲故也癸亥令諸軍指揮使及四蕃將軍賜食于

行宮之外廡戊辰幸邑西之白龍潭以觀魚焉既而漁人獲巨魚以獻帝命放之中流從臣以帝有仁惻之心皆相顧欣然是日名其潭曰萬歲潭丙子帝御城東教場閱兵諸軍都指揮北面招討使太尉楊師厚總領鐵馬步甲十萬廣亘十數里陳焉士卒之雄銳部隊之嚴肅旌旗之雜還戈甲之炤曜屹若山岳勢動天地帝甚悅焉即命丞相洎文武從臣列侍賜食逮晚方歸十一月辛巳朔上駐蹕魏縣從官自丞相而下並詣行宮起

居留都文武百官及諸道節度使防禦使刺史諸藩府

留後各奉表起居壬午帝以邊事稍息宣命還京師

通鑑

帝以夾寨柏鄉屢失利故力疾北巡思一雪其恥意鬱鬱多躁忽功臣宿將往往以小過被誅衆心益懼既而晉趙兵不出十一月壬午帝南還車駕發自行闕夕次洹水縣癸未至

內黃縣甲申至黎陽縣乙酉命從官丞相而下宴于行次丁亥次衛州戊子晨次新鄉夕止獲嘉己丑次武陟庚寅次溫縣延州節度使高萬興奏當軍都指揮使高萬金統領兵士今月五日收鹽州偽刺史高行存泥首

來降丞相及文武百官各上表稱賀辛卯次孟州命散  
騎常侍孫隲右諫議大夫張衍光祿卿李翼各齎香祝  
版告祭于孟津之望祠留都文武官左僕射楊涉洎孟  
州守李周彝等皆匍匐東郊迎拜其文武官並令先還  
壬辰詔旦離孟州晚至都宣宰臣各赴望祠禱雨故事  
皆以兩省無功職事為之帝憂民重農尤以足食足兵  
為念爰自御極每愆陽積陰多命丞相躬其事辛丑大  
雨雪宰相臣及文武師長各奉表賀焉十二月詔以時

雪稍愆命丞相及三省官各詣望祠祈禱癸酉臘假詔

諸王與河南尹左右金吾六統軍等較獵于近苑命大

理卿王鄴使于安南左散騎常侍吳鵠使于朗州皆以

旌節官誥錫之也又命將作少監姜弘道為朗州旌節

官使副

五代會要舊制巡撫陟冊命弔贈入蕃等使選朝臣為之其宣慰加官送旌節即以中官為

之今以三品送旌節新例也

延州節度使高萬行奏領軍于邠州界

蒿子谷韋家寨殺戮寧慶兩州賊軍約二千餘人並生

擒都頭指揮使及奪馬器甲等事其入奏軍將使宣召



赴內殿賜對以銀器絲物錫之宰臣及文武官各奉表

賀是月魏博節度上言于涇縣北戣殺鎮州王鎔兵士

七千餘人奪馬二千餘匹戈甲未知其數並擒都將以

下四十餘人兩浙進大方茶二萬觔琢畫官衣五百副

廣州貢犀象奇珍及金銀等其估數千萬安南兩使留

後曲美

通鑑十二月戊午以靜海曲美為節度使

進筒中蕉五百匹龍腦鬱

金各五瓶他海貨等有差又進南蠻通好金器六物銀

器十二并乾陀綾花縠越跣等雜織奇巧者各三十件

福建進戶部所支權課葛三萬五千匹

舊五代史卷六

舊五代史卷六改證

梁太祖紀六相州刺史李思安為先鋒使○相原本訛  
湘今據通鑑改正

向背若環耳○環耳原本訛環爾今據五代會要改正  
以其偽制來自陳○偽原本訛為今改正

守侍中兼中書令劉隱卒○案劉隱卒五代會要五代  
春秋俱作五月惟通鑑作三月與是書異

丁巳鎮定抄我湯陰○湯陰原本作蕩陰今從通鑑及

歐陽史改正

命閣門使李郁報宰臣兼敕內外○案李郁下衍寶字  
今據列傳刪正

己未帝御朝元門以回鶻吐蕃入覲故也○案己未歐  
陽史作乙未

欽定四庫全書薈要卷五千四百八

舊五代史卷七

宋門下侍郎參知政事監修國史薛居正等撰

梁書第七

太祖紀第七

乾化二年正月宣上元夜任諸市及坊市各點彩燈金  
吾不用禁夜近年以來以都下聚兵太廣未嘗令坊市  
點燈故也甲申以時雪久愆命丞相及三省官羣望祈

禱詔曰謗木求規集囊貢事將裨理道宜限側言應內

外文武百官及草澤竝許上封事極言得失以丁審衡  
為陳州而審衡厚以鞍馬金帛為謝恩之獻帝慮其漁  
民復其獻而停之封保義節度使王檀為琅琊郡王命  
俱奉官朱嶠于河南府宣取先收禁定州進奉官崔騰  
並僉從一十四人並釋放仍命押領送至貝騰唐戶部  
侍郎潔之子也廣明喪亂客于北諸侯為定州節度使  
王處存所辟去載領貢獻至闕未幾其帥稱兵遂繫之

至是帝念賓介之來又已出境特命縱而歸焉丙戌有  
司以孟春太廟薦享上言命丞相杜曉攝祭行事丙申  
夕熒惑犯房第二星二月庚戌中和節御崇勲殿召丞  
相大學士河南尹畧封訖于萬春門外廡賜以酒食

五代

會要二月退封故魏博節度使羅弘信為趙王癸丑勅曰今載春寒頗甚雨澤

仍愆司天監占以夏秋必多霖潦宜令所在郡縣告諭  
百姓備淫雨之患庚申御宣威殿開宴丞相洎文武官  
屬咸被召列侍竟日而罷壬戌帝將巡按北境中外戒



嚴詔以河南尹守中書令判六軍事張宗爽為大內留

守中書門下奏差定文武官領務尤切宜扈駕者三十

八人詔工部尚書李皎左散騎常侍孫騰左諫議大夫

張衍兵部侍郎劉邈兵部郎中張雋光祿少卿盧秉彝

並令扈蹕甲子發自雒師夕次河陽

通鑑云至白馬頓賜從官食多未至

遣騎趣之于路左散騎常侍孫騰右諫議大夫張衍兵部郎中張雋最後至帝命撲殺之

乙丑次溫

縣丙寅次武陟懷州刺史段明遠迎拜于境上其內外

所備咸豐霈焉丁卯次獲嘉戊辰次衛州之新鄉己巳

晨發衛州夕止淇門內衙十將使以十指揮兵士至于

行在辛未駐蹕黎陽癸酉發自黎陽夕次內黃甲戌次

昌樂縣丁丑次于永濟縣青州節度使賀德倫奏統領

兵士赴厯亭軍前戊寅至貝州命四丞相及學士李琪

盧文度知制誥實賞等十五人扈從其左常侍韋戩等

二十三人止焉己卯發自貝州夕駐蹕于野落三月庚

辰朔次于棗強縣之西原

通鑑云辛巳至下博南登觀津冢趙將符習引數百騎巡

邏不知是帝遽前逼之或告曰晉兵大至矣

帝棄行幄亟引兵趣棗強與楊師厚軍合

丙戌鎮定

諸軍招討使楊師厚奏下棗彊縣車駕即日疾馳南還

丁亥復至貝州庚寅楊師厚與副招討李周彝等准詔

來朝辛卯詔丞相翰林大學士文武從官都招討使及

諸軍統指揮使等賜食于行殿壬辰命以羊酒等各賜

從官甲午幸貝州之東閨閱武乙未帝復幸東閨閱騎

軍勅以攻下棗彊縣有功將校杜暉等一十一人並超

加檢校官衙官宋彥等二十五人並超授軍職丙午次

濟源縣詔曰淑律將遷亢陽頗甚宜令魏州差官祈禱

龍潭戊辰詔曰雨澤愆期祈禱未應宜令宰臣各于魏

州靈祠精加祈禱

五代會要三月詔曰夫隆興邦國必本于人民惠養疲羸凡資于令長苟

選求之踰濫固撫理之乖違如聞吏部擬官中書降授或緣親舊所請或為勢要所干姑徇私情靡求才實茲念姦弊宜舉條章今後應中書用人及吏部注擬並宜省藩身之才業驗為政之否臧必有可觀方可任用如或尚行請說猶假貨財其所司人吏必當推窮重加懲斷四月己酉幸魏州金波亭

賜宴宰臣文武官及大學士甲寅夕月掩心大星丙辰勅近者星辰違度式在修禳宜令兩京及宋州魏州取此月至五月禁斷屠宰仍各于佛寺開建道場以迎福

應已未次黎陽縣

通鑑乙卯博王友文來朝請帝還東都丁巳發魏州己未至黎陽以疾淹

留

東都留守官吏奉表起居賜丞相從官酒食有差已

已至東都博王友文以新創食殿上言并進準備內宴  
錢三千貫銀器一千五百兩辛未宴于食殿召丞相及  
文武從官等侍焉帝泛九曲池御舟傾帝墮溺于池中  
宮女侍官扶持登岸驚悸久之制加建昌宮使金紫光  
祿大夫檢校司徒開封尹博王友文為特進檢校太保  
兼開封尹依前建昌宮使充東都留守戊寅車駕發自

東京夕次中年縣五月己卯朔從官文武自丞相而下竝  
詣行殿起居親王及諸道藩帥咸奉表來上庚辰發自鄭  
州至滎陽河南尹魏王宗爽望塵迎拜河陽留後邵贊懷  
州刺史段明遠等遷迺來迺夕次汜水縣帝召魏王宗爽  
入對便于御前賜食數刻乃退壬午駐蹕于汜水宰臣河  
南尹大學士竝于內殿起居敕以建昌宮事委宰臣于兢  
領之五代會要其年六月廢建昌宮以河南尹魏王張宗  
爽為國計使凡天下金穀兵戎舊隸建昌宮者悉主  
之  
癸未帝發自汜水宣令邵贊段明遠各歸所理午憇任

村頓夕次孝義宮留都文武禮部尚書孔續而下道左迎拜  
次偃師甲申至都文武臣奉迎于東郊渤海遣使朝貢宰臣  
薛貽矩抱恙在假不克扈從宣問旁午仍命且駐東京以俟  
良愈及薨帝震悼頗久命維苑使曹守璫往弔祭之又命輟六  
日七日八日朝參丞相文武並詣上閣門進名奉慰丁亥以彗  
星謫見詔兩京見禁囚徒大辟罪以下遞減一等限三日內疏  
理訖聞奏

五代會要彗見于靈臺之西至五月始降赦宥罪  
以答天譴又云五月壬戌夜彗熒犯心大星去心

四度順行司天奏大星為帝  
王之星宜修省以答天譴詔曰生育之人爰當暑月乳哺

之愛方及薰風儻肆意于刳屠豈推恩于長養俾無殄  
暴以助發生宜令兩京及諸州府夏季內禁斷屠宰及  
採捕天民之窮諒由賦分國章所在亦務興仁所在鰥  
寡孤獨廢疾不濟者委長吏量加賑卹史載葬枯用彰  
軫恤禮稱掩骼將致和平應兵戈之地有暴露骸骨委  
所在長吏差人專功收瘞國厲之文尚標七祀良藥之  
市亦載三醫用憐無告之人宜徵有喜之術凡有疫之  
處委長吏檢尋醫方于要路曉示如有家無骨肉兼困



窮不濟者即仰長吏差醫給藥救療之辛卯詔曰亢陽  
滋甚農事已傷宜令宰臣于兢赴中嶽杜曉赴西嶽精  
切祈禱其近京靈廟宜委河南尹五帝壇風師雨師九  
宮貴神委中書各差官祈之

通鑑閏月壬戌帝疾甚謂  
近臣曰我經營天下三十

年不意太原餘孽更昌熾如此吾觀其志不小天復奪  
我年我死諸兒非彼敵也吾無葬地矣因哽咽絕而復  
蘇帝長子郴王友裕早卒次假子友文帝時愛之常留  
守東都兼建昌宮使次郢王友珪其母亳州營倡也為  
左右控鶴都指揮使次均王友貞為東都馬步都指揮  
使初元貞張皇后嚴整多智帝敬憚之后殂帝縱意聲  
色諸子雖在外常徵其婦入侍帝往往亂之友文婦王  
氏色美帝尤寵之雖未以友文為太子帝意常屬之友

珪心不平友珪常有過帝撻之友珪益不自安帝疾甚命王氏召友文于東都欲與之訣且付以後事友珪婦張氏亦朝夕侍帝側知之密告友珪曰大家以傳國寶付王氏懷往東都吾屬死無日矣夫婦相泣左右或說之曰事急計生何不改圖時不可失六月丁丑朔帝命敬翔出友珪為萊州刺史即令之官已宣旨未行勅時左遷者多退賜死友珪益恐戊寅友珪易服微行入左龍虎軍見統軍韓勅以情告之勅亦見功臣宿將多以小過被誅懼不自保遂相與合謀勅以牙兵五百人從友珪雜控鶴士入伏于禁中夜斬關入至寢殿侍疾者皆散走帝驚起問反者為誰友珪曰非它人也帝曰我固疑此賊恨不早殺之汝悖逆如此天地豈容汝乎友珪曰老賊萬殺友珪僕夫馮延諤刺帝腹刃出于背友珪自以敗氈裹之瘞于寢殿秘不發喪遣供奉官丁昭溥馳詣東都命均王友貞殺友文已卯矯詔稱溥王友文謀逆遣兵突入殿中賴郢王友珪忠孝將兵誅之保

全朕躬然疾因震驚彌致危殆宜令友珪權主軍國之務韓勅為友珪謀多出府庫金帛賜諸軍及百官以取悅辛巳丁昭溥還聞友珪已死乃發喪宣遺制友珪即帝位

友珪葬太祖于伊闕縣

號宣陵

五代會要太祖崩年六十一中書侍郎平章事杜曉撰哀冊文門下侍郎平章事趙光逢撰謚

冊文太常卿李燕撰謚議○五代史補云太祖朱全忠黃巢之先鋒巢入長安以刺史王鐸圍同州太祖遂降鐸承制拜同州刺史黃巢滅淮蔡間秦宗權復盛朝廷以淮蔡與汴州相接太祖汴人必究其能否遂移授宣武軍節度使以討宗權未幾滅之自是威福由已朝廷不能制遂有天下先是民間傳識曰五公符又謂之李淳風轉天歌其字有八牛之年識者以八牛乃朱字則太祖革命之應焉○太祖之用兵也法令嚴峻每戰逐隊主帥或有沒而不反者其餘皆斬之謂之跋隊斬自是戰無不勝然健兒且多竄匿州郡疲于追捕因下令

大而健兒丈而自此始也○五代史闕文世傳梁太祖  
迎昭宗于鳳翔素服待臯昭宗佯為鞵系脫呼梁祖曰  
全忠為吾繫鞵梁祖不得已跪而結之流汗浹背時天  
子扈蹕尚有衛兵昭宗意謂左右擒梁祖以殺之其如  
無敢動者自是梁祖被召多不至盡去昭宗禁衛皆用  
汴人矣臣謹案梁祖以天復三年迎唐昭宗于岐下歲  
在甲子其年改天祐至國初建隆庚申歲纔五十六年  
矣然則乾德七十歲人皆目覩其事蓋唐室自懿宗失  
政天下亂離故武宗以下實錄不傳于世昭宗一朝全  
無記注梁祖在位止及六年均帝朝詔史臣修梁祖實  
錄岐下繫鞵之事恥而不書晉天福中史臣張昭重修  
唐史始有昭宗本紀但云即位之始有會昌之風岐陽  
事迹不能退補此亦明唐昭宗有英睿之氣而哀運不  
振又明左右無忠義奮發之臣致梁祖得行其志有所  
警誡不  
可不書

舊五代史卷七

舊五代史卷七攷證

梁太祖紀七仍命押領送至貝○貝原本訛具今據通鑑改正

畧封訖○案此下疑有關文今無可校姑仍之

晨發衛州○案原本脫發字今據文增入

三月庚辰朔次于棗彊縣之西原○案通鑑辛巳趣棗彊與是書異

丙戌奏下棗彊縣車駕即日南還丁亥復至貝州○案

通鑑帝以脩縣未下引兵攻之丁亥始至縣西戊子至冀州與是書異地又案五代春秋二月侵趙克棗彊與是書異月

四月己酉幸魏州○案通鑑乙巳帝發貝州丁未至魏州俱在三月與是書異

宜徵有喜之術○喜原本訛嘉今改正

九宮貴神○貴原本訛降今據通典及新唐書禮志改

正

欽定四庫全書薈要卷五千四百九

舊五代史卷八

宋門下侍郎參知政事監修國史薛居正等撰

梁書第八

末帝紀上

末帝諱瑱初名友貞及即位改名鐸貞明中又改今諱  
太祖第四子也母曰元貞皇后張氏以唐文德元年戊  
申歲九月十二日生於東京帝美容儀性沈厚寡言雅



好儒士唐光化三年授河南府參軍太祖受禪封均王  
時太祖初置天興軍最為親衛以帝為左天興軍使開  
平四年夏進位檢校司空依前天興軍使充東京馬步  
軍都指揮使乾化三年六月二日庶人友珪弑逆矯太  
祖詔遣供奉官丁昭溥馳至東京密令帝害博王友文  
友珪即位以帝為東京留守行開封府尹檢校司徒友珪  
以篡逆居位羣情不附會趙巖至東京從帝私讌因言  
及社稷事帝以誠款謀之巖曰此事易如反掌成敗在

招討楊令公之手但得一言諭禁軍其事立辦巖時典  
禁軍洎還洛以謀告侍衛親軍袁象先帝令腹心馬慎  
交之魏州見師厚且言成事之日賜勞軍錢五十萬緡  
仍許兼鎮慎交燕人也素有膽辨乃說師厚曰郢王殺  
君害父篡居大位宮中荒淫靡所不至洛下人情已去  
東京物望所歸公若因而成之則有輔立之功討賊之  
効師厚猶豫未決謂從事曰吾于郢王君臣之分已定  
無故改圖人謂我何慎交曰郢王以子弑父是曰元兇

均王為君為親正名仗義彼若一朝事成令公何情自  
處師厚驚曰幾誤計耳乃令小校王舜賢至洛密與趙  
巖袁象先圖議時有左右龍驤都在東京帝偽作友珪  
詔遣還洛下先是劉重遇部下龍驤一指揮于懷州叛  
經年搜捕其黨帝因遣人激怒其衆曰郢王以龍驤軍  
嘗叛汝等洛下將盡坑之翼日乃以偽詔示之

通鑑  
攷異

云梁太祖實錄丙戌東京言龍驤軍准詔追赴西京軍  
情不肯進發實友珪激之非友貞偽作但激怒言坑之  
耳  
諸軍憂恐將校垂泣告帝乞指生路帝諭之曰先帝

三十餘年經營社稷千征萬戰爾等皆曾從行今日先  
帝尚落人奸計爾等安所逃避因出梁祖御容以示諸  
將帝欷歔而泣曰郢王賊害君父違天逆地復欲屠滅  
親軍爾等苟能自趨洛陽擒取逆豎告謝先帝即轉禍  
為福矣衆踊躍曰王言是也皆呼萬歲請帝為主時偽  
鳳歷元年二月十五日也帝乃遣人告趙巖袁象先傅  
暉朱珪等十七日象先引禁軍千人突入宮城遂誅友  
珪事定象先遣趙巖賁傳國寶至東京請帝即位于洛

陽帝報之曰夷門太祖創業之地居天下之衡北拒并  
汾東至淮海國家藩鎮多在厥東命將出師利于便近  
若都洛下非良圖也公等如堅推戴冊禮宜在東京賊  
平之日即謁洛陽陵廟是月帝即位于東京乃去鳳厯  
之號稱乾化三年詔曰我國家賞功罰罪必叶朝章報  
德伸冤敢欺天道苟顯違于法制雖暫滯于歲時終振  
大綱須歸至理重念太祖皇帝嘗開霸府有事四方迨  
建皇朝載遷都邑每以主留重務居守難才慎擇親賢

方膺寄任故博王友文才兼文武識達古今俾分憂于  
在浚之郊亦共理于興王之地一心無易二紀于茲嘗  
施惠于士民實有勞于家國去歲郢王友珪常懷逆節  
已露凶鋒將不利于君親欲竊窺于神器此際值先皇  
寢疾大漸日臻博王乃密上封章請嚴宮禁因以萊州  
刺史授于郢王友珪纔覩宣頭俄行大逆豈有自縱兵  
于內殿却翻事于東都又矯詔書枉加刑戮乃奪博王  
封爵又改姓名冤恥兩深欺誑何極伏賴上玄垂祐宗

社降靈俾中外以叶謀致遐邇之共怒尋平內難獲勦  
元兇既雪恥于同天且免譏于共國朕方期適世敢竊  
臨人遽迫推崇爰膺纘嗣寃憤既伸于幽顯霈澤宜及  
于下泉博王宜復官爵仍令有司擇日歸葬云三月丁  
未制曰朕仰膺天睠近雪家讎旋聞將相之謀請紹祖  
宗之業羣情見迫三讓莫從祇受推崇懼不負荷方欲  
蒸嘗寢廟裡類郊丘合徵文體之辭用表事神之敬其  
或于文尚淺在理未周亦冀隨時別圖制義雖臣子行

孝重更名于己孤而君父稱尊貴難知而易避今則虔  
遵古典詳考前聞允諧龜筮之占庶合帝王之道載惟  
涼德尤愧嘉名中外羣寮當體朕意宜改名鎰庚戌以  
天雄軍節度使充潞州行營都招討使開府儀同三司  
檢校太尉兼侍中弘農郡王楊師厚為檢校太師兼中  
書令進封鄴王壬戌以夏州節度使檢校太尉同平章  
事李仁福為檢校太師進封隴西郡王戊辰以邢州保  
義軍留後檢校太保戴思遠為檢校太傅充邢州節度



使庚午以鎮東軍節度副使充兩浙西面都指揮使行  
睦州刺史馬綽為檢校太傅同平章事領秦州雄武軍  
節度使進封開國侯是月文武百官上言請以九月十  
二日帝降誕日為明聖節休假三日從之夏四月癸未  
以西京內外諸軍馬步軍都指揮使檢校司徒左龍虎  
統軍濮陽郡開國侯袁象先為特進檢校太保同平章  
事充鎮南軍節度江南西道觀察處置等使開封尹判  
在京馬步諸軍事進封開國公增食邑一千戶丁酉宣

義軍節度副大使知節度事鄭滑濮等州觀察使檢校  
太傅長沙郡開國公羅周翰加特進駙馬都尉五月乙  
巳天雄軍節度使楊師厚及劉守奇率魏博邢洺徐兗  
鄆滑之衆十萬討鎮州庚戌營于鎮之南門外壬子晉  
將史建塘自趙州領騎五百入于鎮州師厚知其有備  
自九門移軍于下博劉守奇以一軍自貝州掠冀州衡  
水阜城陷下博師厚自弓高渡御河逼滄州張萬進懼  
送款師厚表請以萬進為青州節度使以劉守奇為滄

州節度使詔曰太祖皇帝六月二日大忌朕聞姬周已  
還並用通喪之禮炎漢之後方行易月之儀歷代相沿  
萬幾斯重遂為故實難遽改更朕頃遭家寃近平內難  
倏臨祥制俯迫忌辰音容永遠而莫追號感彌深而難  
抑將欲表宅憂于中禁是宜輟聽政于外朝雖異常儀  
願申罔極宜輟五月二十二日至六月二十九日朝參  
軍機急切公事即不得留滯並仰畫時聞奏施行宰臣  
文武百官三上表以國忌廢務多日請依舊制詔報曰

朕聞禮非天降固可酌于人情事繫孝思諒無妨于國  
體今以甫臨忌日暫輟視朝冀全哀戚之情用表始終  
之節宰臣等累陳章表備述古今慮以萬幾之繁議以  
五日之請雖茲懇切難盡允俞況保身方荷于洪基敢  
言過毀而權制獲申于至性必在得中宜自今月二十  
九日輟至六月七日無煩抑請深體朕懷六月戊子以  
滄州順化軍節度使并潞鎮定副招討使檢校太傅同  
平章事張萬進為青州節度使秋九月甲辰以光祿大

夫守御史大夫吳興郡開國侯姚洎為中書侍郎平章  
事十二月庚午以前鄆州節度檢校司徒食邑二千戶  
福王友璋為許州節度使檢校太保是月晉王收幽州  
執偽燕主劉守光及其父仁恭歸晉陽

乾化四年春正月壬寅以青州節度使張萬進為兗州  
節度使檢校太尉二月甲戌以感化軍節度使華商等  
州觀察使檢校太傅同平章事太原郡開國公康懷英  
為大安尹充永平軍節度使大安金棣等州觀察處置

使夏四月丁丑以守司空平章事于兢為工部侍郎尋  
貶萊州司馬以其挾私與軍校遷改故也是日以行營  
左先鋒馬軍使濮州刺史王彥章為澶州刺史充行營  
先鋒步軍都指揮使加光祿大夫檢校太保封開國伯  
以永平軍節度使檢校太傅同平章事劉鄩為開封尹  
遙領鎮南軍節度使五月癸丑朔方軍留後檢校司徒  
韓洙起復授朔方軍節度使檢校太保秋七月晉王率  
師自黃澤嶺東下寇邢洺魏博節度使楊師厚軍于漳

水之東晉將曹進金來奔晉軍遂退九月徐州節度使  
王殷反時朝廷以福王友璋鎮徐方殷不受代乃下詔  
削奪殷在身官爵仍令却還本姓蔣便委友璋及天平  
軍節度使牛存節開封尹劉鄩等進軍攻討是時蔣殷  
求救于淮南楊溥遣大將朱瑾率衆來援存節等逆擊  
敗之

貞明元年春牛存節劉鄩拔徐州逆賊蔣殷舉族自燔  
而死于火中得其屍梟首以獻詔福王友璋赴鎮閏二

月甲午延州節度使太原西面招討應接使檢校太師  
兼中書令渤海郡王高萬興進封渤海王三月辛酉朔  
以天平軍節度副大使知節度事兼淮南西北面行營  
招討應接等使檢校太傅同平章事牛存節為檢校太  
尉加食邑一千戶賞平徐之功也丁卯以右僕射兼門  
下侍郎同平章事監修國史判度支趙光逢為太子太  
保致仕魏博節度使楊師厚薨輟視朝三日初師厚握  
強兵據重鎮每邀朝廷姑息及薨輟視朝三日或者以



為天意祖庸使趙巖祖庸判官邵贊獻議于帝曰魏博六州精兵數萬蠹害唐室百有餘年羅紹威前恭後倨太祖每深含怒太祖尸未屬續師厚即肆陰謀蓋以地廣兵強得肆其志不如分削使如身使臂即無不從也陛下不以此時制之寧知後之人不為楊師厚耶若分割相魏為兩鎮則朝廷無北顧之患矣帝曰善即以平盧軍節度使賀德倫為天雄軍節度使遣劉鄩率兵六萬屯河朔詔曰分疆裂土雖賞勲勞建節屯師亦從機

便比者魏博一鎮巡屬六州為河朔之大藩實國家之  
巨鎮所分憂寄允謂重難將叶事機須期通濟但緣鎮  
定賊境最為魏博親鄰其次相衛兩州皆控澤潞山口  
兩道並連于晉土分頭常冠于魏封既須日有戰爭未  
若俱分節制免勞兵力因奔命于兩途稍泰人心俾安  
居于終日其相州宜建節度為昭德軍以澶衛兩州為  
屬郡以張筠為相州節度使已丑魏博軍亂囚節度使  
賀德倫是時朝廷既分魏博六州為兩鎮命劉鄩統大

軍屯于南樂以討王鎔為名遣澶州刺史行營先鋒步

軍都指揮使王彥章領龍驤五百騎先入于魏州屯于

金波亭詔以魏州軍兵之半隸于相州并徙其家焉又

遣主者檢察魏之帑廩既而德倫促諸軍上路姻族辭

決哭聲盈巷其徒乃相聚而謀曰朝廷以我軍府強盛

故設法殘破况我六州厯代藩府軍門父子姻族相連

未嘗遠出河門離親去族一旦遷于外郡生不如死三

月二十九日夜魏軍乃作亂放火大掠首攻龍驤軍王

彥章斬關而遁遲明殺德倫親軍五百餘人于牙城執  
德倫置之樓上有劾節軍校張彥者最為麤暴膽氣伏  
人乃率無賴輩數百止其剽掠是日魏之士庶被屠戮  
者不可勝紀帝聞之遣使齎詔安撫

通鑑夏四月帝遣  
供奉官扈異撫諭

魏軍仍許張彥除郡厚賜將士優賞彥等不遜投詔于地

侮罵詔使因迫德倫飛奏請却復相衛抽退劉鄩軍帝  
復遣諭曰制置已定不可改易如是者三彥等奮臂南  
向而罵曰傭保兒敢如是也復迫德倫列其事時有文

吏司空頽者甚有筆才彥名見謂曰為我更草一狀詞  
宜抵突如更敢違則渡河擄之乃奏曰臣累拜封章上  
聞天聽在軍衆無非共切何朝廷皆以為閑半月三軍  
切切而戈矛未息一城生聚皇皇而控告無門惟希俯  
鑒丹衷苟從衆欲須垂聖允斷在不疑如或四向取謀  
但慮六州俱失言非意外事在目前張彥又以楊師厚  
先兼招討使請朝廷依例授之故復逼德倫奏曰臣當  
道兵甲素精貔貅極銳下視并汾之敵平吞鎮定之人

特乞委臣招討之權試臣湯火之節苟無顯効任賜明  
誅詔報曰魏博寇敵接連封疆懸遠凡于應赴須在師  
徒是以別建節旄各令捍禦并鎮則委魏博控制澤潞  
則遣相衛枝梧咸逐便安貴均勞逸已定不移之制宜  
從畫一之規至于征伐事權亦無定例且臨清王領鎮  
之日羅紹威守藩以來所領事銜本無招討祇自楊師  
厚先除陝滑二帥皆以招討兼權因茲帶過鄴中原本  
不曾落下苟循事體寧恡施行況今劉鄩指鎮定出

征康懷英往邠岐進討祇令統帥師旅亦無招討使銜  
切宜徧諭羣情勿興浮議倚注之意卿宜體之詔至張  
彥壞裂抵之于地謂德倫曰梁主不達時機聽人穿鼻  
城中擾攘未有所依我甲兵雖多須資勢援河東晉王  
統兵十萬匡復唐朝世與大梁仇讎若與我同力事無  
不濟請相公改圖以求多福德倫不得已而從之乃遣  
牙將曹廷隱奉書求援于太原彥使德倫告諭軍城曰  
可依河東稱天祐十三年此後如有人將文字于河南

往來便仰所在處置是月邠州留後李保衡以城歸順  
保衡楊崇本養子也崇本乃李茂貞養子任邠州二十  
餘年去歲為其子彥魯所毒彥魯領知州事五十餘日  
保衡殺彥魯送款于帝即以保衡為華州節度使以河  
陽留後霍彥威為邠州節度使五月晉王率師赴魏州  
節度使牛存節薨是月鳳翔李茂貞遣偽署涇州節度  
使劉知俊率師攻邠州以李保衡歸順故也自是凡攻  
圍十四月節度使霍彥威諸軍都指揮使黃貴堅守捍



寇會救軍至岐人乃退六月庚寅晉王入魏州以賀德倫為大同軍節度使舉族遷于晉陽是月晉人陷德州

秋七月又陷澶州刺史王彥章棄城來奔

通鑑晉人夜襲澶州刺史

王彥章在劉鄩營晉人獲其妻子

是月劉鄩自洹水潛師由黃澤路西

趨晉陽至樂平縣值霖雨積旬乃班師還次宗城遂至

貝州軍於堂邑遇晉軍轉鬬數十里晉軍稍退翼日鄩

移軍于莘八月賀瓌收復澶州九月以行營先鋒步軍

都指揮使行澶州刺史檢校太保王彥章為汝州防禦

使依前行營先鋒步軍都指揮使壬午正衙命使冊德妃張氏是夕妃薨冬十月辛亥康王友孜謀反伏誅是夕帝于寢殿熟寐忽聞御榻上寶劍有聲帝遽起視之而友孜之黨已入于宮中帝揮之獲免

清異錄末帝夜于寢間擒刺客

乃康王友孜所遣帝自戮之造雲母匣貯所用劍名匣曰護聖將軍之館

壬午葬德妃張氏

十一月乙丑改乾化五年為貞明元年十二月乙未詔

升華原縣為崇州靜勝軍以美原縣為裕州以為屬郡以偽命義勝軍節度使鼎耀等州觀察使特進檢校太

保同平章事李彥韜為特進檢校太傅同平章事充靜  
勝軍節度使崇裕等州觀察使河內郡開國侯仍復本  
姓溫名昭圖昭圖華原賊帥也李茂貞以為養子以華原  
為耀州美原為鼎州偽命昭圖為節度使至是歸款故  
有是命

貞明二年春正月庚申以皇伯父宋州節度使開府儀  
同三司檢校太師兼中書令廣王全昱為守中書令餘  
如故

通鑑二年春正月宣武節度使守中書令廣德靖王全昱卒

以浙江東道營田

副使檢校太傅前常州刺史杜建徽遙領涇州節度使  
二月丙申右僕射門下侍郎平章事諸道鹽鐵轉運等  
使楊涉罷相守左僕射涉累上章以疾辭位故有是命  
是月命許州節度使王檀河陽節度使謝彥章汝州防  
禦使王彥章率師自陰地關抵晉陽急攻其壘不克而  
旋三月劉鄩率師與晉王大戰于故元城鄩軍敗績先  
是鄩駐于莘帝以河朔危急師老于外餉饋不充遣使  
賜鄩詔微有責讓鄩奏以寇勢方盛未可輕動帝又問

鄆決勝之策鄆奏曰但人給糧十斛盡則破敵帝不悅復遣促戰鄆召諸將會議諸將欲戰鄆默然一日引軍攻鎮定之營彼衆大駭上下騰亂俘斬甚衆時帝遣偏將楊延直領軍萬餘人屯澶州以應鄆既而晉王詐言歸太原劉鄆以為信是月召楊延直會于魏城下鄆自率軍亦至與延直會既而晉王自貝州至鄆引軍漸退至故元城西與晉人決戰大為其所敗追襲至河上軍士赴水死者甚衆鄆自黎陽濟河奔滑州已巳制以

鄆為滑州宣義軍節度副大使知節度事晉人攻衛州  
陷之又陷惠州夏四月乙酉朔威武軍節度使守太傅  
兼中書令閩王王審知賜號忠勤保安興國功臣餘如  
故晉人陷洺州癸卯夜捉生都將李霸作亂龍驤都將  
杜晏球討平之時遣捉生軍千人戍楊劉軍出宋門外  
是夜由水門復入二鼓大譟火發燭城李霸與其徒燔  
建國門不克龍驤都將杜晏球屯鞠場聞亂兵至率騎  
擊之亂軍退走馬登建國門晏球奏曰亂者惟李霸一

軍但守宮城遲明臣必破之未明晏球誅霸及其同惡  
京師方定是月以行營先鋒步軍都指揮使汝州防禦  
使王彥章為鄭州防禦使依前先鋒步軍都指揮使五  
月晉軍還太原六月晉人急攻邢州帝遣捉生都將張  
溫率步騎五百人入于邢州至內黃溫率衆降于晉人  
秋七月甲寅朔晉王自太原至魏州節度使張筠棄城  
奔京師邢州節度使閻寶以城降于晉王壬戌以淮南鎮  
海鎮東等軍節度使充淮南宣潤等道西面行營都統開

府儀同三司尚父守尚書令吳越王錢鏐為諸道兵馬  
元帥餘如故以左僕射楊涉為太子太傅致仕八月丁  
酉以開府儀同三司太子太保致仕趙光逢為司空兼  
門下侍郎平章事弘文館太學士延資庫使充諸道鹽  
鐵轉運使九月晉王還太原滄州節度使戴思遠棄城

來奔晉人陷貝州

歐陽史本紀二年九月晉人克貝州  
守將張源德死之又死事傳畧云太

祖時源德自金兵衛將軍為蔡州刺史貞明元年魏博  
節度使楊師厚卒末帝分魏相等六州為兩鎮遣劉鄩  
將兵萬人屯于魏魏軍叛降晉源德為鄆守貝州晉王  
入魏諸將欲先擊貝州晉王曰貝城小而堅攻之難卒



下乃先襲破德州然後以兵五千攻源德源德堅守不下晉軍壘而圍之已而劉鄩大敗于故元城南走黎陽六鎮數十州之地皆歸晉獨貝一州圍之踰年不可下源德守既堅而貝人間晉已盡有河北城中食且盡乃勸源德出降源德不從遂見殺已卯天平軍節度副大使知節度事檢

校太師兼中書令瑯邪郡王王檀薨八月丁酉以開府儀同三司中書侍郎兼吏部尚書同平章事集賢殿大學士判戶部敬翔為右僕射兼門下侍郎平章事監修國史判度支以光祿大夫中書侍郎同平章事鄭珏為特進兼刑部尚書平章事集賢殿大學士判戶部十月

晉王自太原至魏州是月前昭義軍節度使檢校太師  
兼侍中陳留郡王葛從周薨是歲河北諸州悉入于晉

舊五代史卷八

舊五代史卷八攷證

梁末帝紀上末帝諱瑱○案瑱原本訛瑱今從歐陽史  
改正

太祖第四子也○案歐陽史作第三子五代會要與是  
書同蓋并假子博王友文而數之也

以帝為左天興軍使 案原本脫使字今據歐陽史增  
入

帝乃遣人告趙巖袁象先傅暉朱珪等○案原本脫暉

字今據通鑑增入

近雪家讎○案原本脫家字今據冊府元龜增入

濮陽郡開國侯袁象先○濮陽原本作博陽今據象先  
本傳改正

師厚自弓高渡逼滄州張萬進懼○滄州原本作涼州  
攷歐陽史劉守先傳萬進乃滄州守將今改正

滄州順化軍節度使張萬進為青州節度使○案順化  
原本作順侯今據通鑑注滄州為順化軍改正又青

州通鑑作平盧攷後文是時賀德倫為平盧節度使  
當從此書作青州為是

寇邢洺○邢原本作鄜今據五代春秋七月來侵邢州  
改正

貞明元年春牛存節劉鄩拔徐州○案徐州之拔是書本  
紀及蔣殷傳俱不書月五代春秋及歐陽史俱作正月通  
鑑作二月通鑑攷異又作乾化四年十一月未詳孰是  
判度支趙光逢○逢原本作遠今據唐書列傳改正

既須日有戰爭○案原本脫戰爭二字今據冊府元龜  
增入

王彥章為汝州防禦使○汝州原本作許州今據通鑑

正

王友孜謀反○案友孜通鑑作友敬與是書異

十一月乙丑改乾化五年為貞明元年○案通鑑考異  
引吳越備史作正月壬辰朔改元大赦歐陽史五代  
春秋俱從是書



總校官庶吉士 程嘉謨

校對官主事 王福清

謄錄監生 任遇春



欽定四庫全書薈要

史部

舊五代史卷九至十四

詳校官內閣侍讀臣孫



欽定四庫全書薈要卷五千四百十

舊五代史卷九

宋門下侍郎參知政事監修國史薛居正等撰

書第九

末帝紀中

貞明三年春正月戊午以前淄州刺史高允奇為右羽  
林統軍癸亥以前天平軍馬步軍都指揮使檢校太保  
朱勅為懷州刺史癸酉以右天武軍使石釗為密州刺

史戊寅以前懷州刺史李建為安州刺史仍賜名知節

己卯以宣義軍節度副大使知節度事北面行營副招

討等使特進檢校太傅霍彥威為天平軍節度副大使

知節度事二月甲申晉王攻我黎陽劉鄩拒之而退乙

酉前蔡州刺史董璋權知宣義軍軍州事丁亥以前右

羽林軍統軍梁繼業為左衛上將軍壬辰以租庸判官

檢校司徒張紹珪為光祿卿依前充租庸判官癸巳以

權知平盧軍軍州事客省使知銀臺事元湘為檢校司

空甲午以飛龍使婁繼英為左武衛大將軍三月庚申  
以前平戎軍使檢校司徒郭紹賓為禧州刺史辛酉以  
前天平軍節度副使裴彥為隨州刺史戊寅湖州刺史  
錢傳璟蘇州刺史錢傳璟鎮海軍節度副使錢傳瓘溫  
州刺史錢傳璣睦州刺史錢傳琬寶州刺史錢傳瓘明  
州刺史錢傳球義州刺史錢傳琇峯州刺史錢傳珣鬱  
州刺史錢傳琰鎮海軍都知兵馬使錢傳璠等凡一十  
一人竝加官勲階爵從吳越王錢鏐之請也夏四月庚

辰以前行左武衛大將軍蔡敬思為右武衛上將軍辛巳以前安州刺史劉玘權知晉州軍州事以前密州刺史張實為潁州刺史充本州團練使癸未以六軍押衙充左天武軍使劉彥珪為澶州刺史辛卯以右千牛衛大將軍劉璩充契丹宣諭使詔諸道兵馬元帥開幕除吏一同天策上將府故事辛丑以清海軍元從都押衙隴州刺史吳鏐為檢校司空癸卯以兩浙衙內先鋒指揮使守峯州刺史錢傳珣為泗州刺史六月庚辰以前

東京馬步都指揮使兼左天武軍使雷景從為汝州刺史充本州防禦使辛卯以租庸判官光祿大夫檢校司徒行光祿卿張紹珪為申州刺史壬辰以權知晉州建寧軍軍州事前安州刺史劉玘為建寧軍節度觀察留後秋七月丁巳以淄州刺史陳洪為棣州刺史乙丑以刑部員外郎封翹為翰林學士丙寅以汝州刺史楊延直為左衛大將軍以前左衛上將軍劉重霸為起復雲麾將軍右驍衛上將軍庚午以六軍諸衛副使起復雲

麾將軍檢校太保張業為淄州刺史八月辛巳以左神  
武軍統軍周武為寧州刺史以左崇安指揮使前申州  
刺史劉仁鐸為衍州刺史戊子泰寧軍節度使張萬進  
賜名守進九月庚申以遙領常州刺史張昌孫遙領壽  
州刺史充本州團練使冬十月壬午以權西面行營都  
監左武衛上將軍張筠權知商州軍州事戊子詔曰太  
子太傅李戡多因釋教誑惑羣情此後不得出入無恒  
癸巳以前崇德軍使張思綰為左武衛上將軍己亥以

啟聖匡運同德功臣諸道兵馬元帥淮南鎮海鎮東等  
軍節度使充淮南宣潤等四面行營都統開府儀同三  
司尚書令吳越王錢鏐為天下兵馬元帥壬寅以尚書  
左丞吳藹為工部尚書充兩浙官告使是月晉王自魏  
州還太原閏十月丁卯以前商州刺史徐璠為左驍衛  
上將軍充西都大內皇牆使十一月壬午以中書侍郎  
平章事鄭珣權判戶部事戊子以寧州刺史周武為武  
靜軍防禦使守慶州刺史以河潼軍使竇廷琬為寧州



刺史十二月晉王自太原復至魏州庚申以左金吾衛  
大將軍充街使華溫琪為右龍虎軍統軍以右龍虎軍  
統軍張彥勳為商州刺史以前西京大內皇牆使李項  
為右威衛上將軍以左金吾衛上將軍李周彞權兼左  
街使壬戌以守太尉兼中書令河南尹判六軍諸衛事  
魏王張宗奭為天下兵馬副元帥丙寅以西面行營馬  
軍都指揮使檢校太保鄭州刺史充本州防禦使王彥  
章為檢校太傅丁卯以西面行營馬步都指揮使左龍

虎軍統軍賀瓌為檢校太傅同中書門下平章事充宣

義軍節度使鄭滑濮等州觀察處置等使

通鑑云時論平慶州功故

賀瓌進秩

己巳帝幸洛陽為來年有事於南郊也遂幸伊闕

親拜宣陵時租庸使趙巖勸帝郊天且言帝王受命須

行此禮願陛下力行之宰臣敬翔奏曰國家自劉鄩失

律已來府藏殫竭箕歛百姓供軍不暇郊祀之禮頒行

賞賚所謂取虛名而受實弊也況晉人壓境車駕未可輕

動帝不聽遂行是月晉人陷楊劉城帝聞之懼遂停郊

禮車駕急歸東京

通鑑云道路訛言晉軍已入大梁拒

惶駭失圖  
逃罷郊祀

癸酉詔文武兩班除元隨駕人數外其餘竝

令御史司憲張袞部署候車駕離京後一兩日發赴東

京甲戌以天下兵馬副元帥太尉兼中書令河南尹魏

王張宗奭為西都留守

貞明四年春正月晉人寇鄆濮之境車駕至自洛陽庚

辰以蔡州刺史姚勅權知感化軍節度觀察留後乙酉

以前靜難軍馬步軍都指揮使黃貴為蔡州刺史甲午

以右領軍衛上將軍齊奉國為左金吾衛大將軍充街  
使二月遣將謝彥章帥衆數萬追楊劉城甲子晉王來  
援楊劉城彥章之軍不利而退三月壬午以前右武衛  
上將軍張筠為左衛上將軍癸巳以鎮國軍節度押衙  
充本道馬步軍都指揮使江可復為衍州刺史壬寅鎮  
海鎮東等軍節度行軍司馬秦州節度使檢校太傅同  
平章事馬綽加檢校太尉同平章事依前鎮海鎮東等  
軍節度行軍司馬餘如故從錢鏐之請也夏四月丁未

以宣徽院使右衛上將軍趙穀權知青州軍州事以宣徽院副使韋堅權知本院事己酉以銀青光祿大夫行中書侍郎同中書門下平章事權判戶部鄭珏為金紫光祿大夫中書侍郎兼刑部尚書平章事集賢殿大學士判戶部上柱國仍進封滎陽郡開國侯加食邑五百戶以金紫光祿大夫行尚書吏部侍郎上柱國蘭陵縣開國男食邑三百戶蕭頊為中書門下平章事仍進封蘭陵縣開國伯加食邑四百戶庚戌以前崇德軍使前

右武衛大將軍杜存為右領軍衛上將軍甲寅以刑部  
郎中充史館修撰竇專為翰林學士初學士竇夢徵草  
錢鏐麻貶蓬萊尉帝召專入翰林遣崇政使李振問宰  
相云專是宰臣蕭頊女婿令中書商量可否中書奏曰  
宰相親情不居清顯避嫌之道雖著舊規若蒙特恩亦  
有近例固不妨事帝乃可之己未靈武節度使韓洙洛  
起復授開府儀同三司依前檢校太傅同平章事癸亥  
以延州忠義軍節度使太原西面招討應接使檢校太

師兼中書令渤海王高萬興兼鄜延兩道都制置使餘如故時萬興弟鄜州節度使萬金卒故有是命己巳以開府儀同三司守司空兼門下侍郎同平章事趙光逢為司徒致仕兼加食邑五百戶以光逢累上章請老故也辛未詔宰臣敬翔權判諸道鹽鐵使務壬申以太子賓客趙光胤為吏部侍郎五月甲戌以荆南衙內馬步軍都指揮使檢校司徒高從誨領濠州刺史乙亥以特進檢校太傅前潁州團練使張實為起復雲麾將軍依

前潁州團練使庚辰以工部尚書致仕孔拯為國子祭  
酒己丑以太常少卿韋彖為右諫議大夫六月甲辰以  
金紫光祿大夫檢校司徒歙州刺史朱令德為忠武軍  
節度觀察留後己酉以權知感化軍兩使留後特進檢  
校太保姚勅為感化軍節度觀察留後庚戌上以祕書  
少監王翹為將作監以其父名祕故也丙辰以左監門  
衛將軍康贊美為商州刺史以左衛上將軍張筠為權  
知永平軍節度觀察留後兼判大安府事戊午以前景



州刺史衛審符為右衛大將軍庚申以河陽節度充北面行營排陣兩京馬軍都軍節度等使光祿大夫檢校太保謝彥章為匡國軍節度陳許蔡等州觀蔡處置等使以宣徽院副使韋堅權知河陽軍州事秋七月庚辰以商州刺史康贊美為起復雲麾將軍依前商州刺史辛卯以前左驍衛上將軍揚詔為右武衛上將軍戊戌以前匡國軍節度使檢校尚書左僕射羅周敬為檢校司空守殿中監駙馬都尉八月丙午以右廣勝軍使劉

君鐸為虢州刺史戊申以武寧軍節度副使李存權知  
宿州事辛亥涇原節度使杜建徽加檢校太傅同平章  
事建徽吳越王錢鏐之將也遙領涇原節制至是以其  
上請加恩故有是命乙卯以蔡州刺史黃貴為絳州刺  
史辛酉以絳州刺史尹皓為感化軍節度觀察留後癸  
亥以前永平軍節度副使張正己為房州刺史乙丑以  
宿州團練使趙麓權知河陽節度觀察留後以左驍衛  
將軍劉去非為郢州刺史戊辰以權知永平軍節度觀

察留後兼判大安府事張筠為永平軍節度觀察留後  
依前兼判大安府事是月晉王率師次楊劉口遂軍於  
麻家渡北面招討使賀瓌以兵屯濮州北行臺村對壘  
百餘日晉王以輕騎來覘許州節度使謝彥章發伏兵  
掩擊圍之數重會救軍至晉王僅以身免九月丁丑靜  
勝軍節度崇裕等州觀察處置等使特進檢校太傅同  
平章事溫昭圖加檢校太尉甲午崇政院副使張希逸  
加金紫光祿大夫行秘書少監乙未起復雲麾將軍檢

授太保壽州團練使張昌孫落起復授光祿大夫檢校  
太傅冬十月辛丑朔以前感化軍節度觀察留後特進  
檢校太保姚勅為左龍虎統軍充西都內外馬步軍都  
指揮使以洛苑使金紫光祿大夫檢校司徒守左威衛  
大將軍董璋為右龍虎統軍己酉以安南靜海節度使  
檢校司徒曲美為檢校太保同平章事庚戌以高州刺  
史康贊美為蔡州刺史十一月壬辰前懷州刺史朱勅  
授起復雲麾將軍依前懷州刺史十二月庚子朔晉王

領軍迫行臺寨距寨十里結營而止北面招討使賀瓌  
殺許州節度使謝彥章濮州刺史孟審澄別將侯溫裕  
等于軍以謀叛聞為行營馬步都虞候朱珪搆之也晉  
王聞之喜曰彼將帥不和亡無日矣丁未以行營諸軍  
馬步都虞候光祿大夫檢校太保曹州刺史朱珪為檢  
校太傅充匡國軍節度觀察留後依前行營諸軍馬步  
都虞候癸丑詔曰行營諸軍馬步都虞候匡國軍節度  
觀察留後朱珪昨以寇戎未滅兵革方嚴所期朝夕之

間克弭烟塵之患每於將帥別注憂勞而謝彥章孟審

澄侯溫裕忽構異圖將萌逆節賴朱珪挺施貞節密運

沈機果致梟擒免資讎敵特加異殊之命用旌忠孝之

謀便委雄藩俾荷隆渥可檢校太傅充平盧軍節度淄

青登萊等州觀察處置押新羅渤海兩番等使兼行營

諸軍馬步軍副都指揮使仍進封沛國郡開國侯上巳

起復雲麾將軍檢校太保陳州刺史惠王友能鎮國軍

節度陝虢等州觀察處置等使起復雲麾將軍檢校太

保邵王友誨竝落起復加檢校太傅以前房州刺史牛  
知業為右羽林軍統軍癸亥北面招討使賀瓌率大軍  
與晉人戰於胡柳陂晉人敗績是日旣晡復為晉人所  
敗初晉人起軍將襲東京乃下令軍中老弱悉歸于鄴  
是月二十二日晉王次臨濮賀瓌王彥章自行臺寨率  
軍躡之二十四日至胡柳陂晉王領軍出戰瓌軍已成  
列晉王以騎突之王彥章一軍先敗彥章走濮陽晉人  
輜重在陣西瓌領軍薄之晉人大奔自相蹈藉死者不

可勝紀晉大將周德威歿于陣璩軍乃登土山列陣於山之下晉王復領兵來戰璩軍遂敗翼日晉人攻濮陽陷之京師戒嚴

貞明五年春正月晉人城德勝夾河為柵二月乙巳以宣徽院副使韋堅權知徐州軍事三月己卯以華州感化軍留後尹皓為華州節度使加檢校太保同平章事癸未制削奪兗州節度使張守進在身官爵以其叛故也仍命劉鄩為兗州管內安撫制置使領兵以攻之夏



四月壬寅以永平軍留後兼判大安府事張瑄為永平軍節度使檢校太保行大安尹庚戌以鎮海軍北面水陸都指揮使湖州刺史檢校太傅錢傳璟遙領宣州寧國軍節度使加同平章事是月賀瓌攻德勝南城以艤艫戰艦橫於河以扼津濟之路晉人斷其艤艫濟軍以援南城瓌等退軍五月己巳山南東道節度使檢校太傅孔勅加同平章事丁亥以延州節度使鄜延兩道都制置太原西面招討應接等使渤海郡王高萬興為檢

校太師兼中書令充保大忠義等軍節度廊延管内觀察等使是月以行營諸軍左廂馬軍都指揮使鄭州防禦使王彥章為許州匡國軍節度觀察留後依前行營諸軍左廂馬軍都指揮使六月壬戌以天驕院使李隨權知登州軍州事秋七月晉王自魏州還太原八月乙未朔滑州節度使賀瓌卒輟視朝三日詔贈侍中是月命開封尹王瓚為北百行營招討使瓚乃與許州留後王彥章等率大軍自黎陽濟營于楊村造浮梁以通津

路九月丙寅制削奪廣州節度使南平王劉巖在身官  
爵以其將謀僭號故也仍詔天下兵馬元師錢鏐指揮  
攻討冬十月晉王復至魏州是月劉鄩攻下兗州擒張  
守進夷其族十一月丁丑以兗州安撫制置使特進檢  
校太傅大彭郡開國公劉鄩為兗州節度使開府儀同  
三司檢校太尉同平章事賞平兗之功也辛卯王瓚帥  
師至威城遇晉軍交綏而退十二月戊戌晉王領兵迫  
河南寨王瓚率師禦之獲晉將石家才旣而瓚軍不利

瓚退保陽村寨晉人陷濮陽

舊五代史卷九

舊五代史卷九攷證

梁末帝紀中以宣義軍節度副大使知節度事○案原本脫副字考新唐書百官志及五代會要副大使為藩鎮官爵今增入

蘇州刺史錢傳璫○傳璫原本作傳珣今據十國春秋改正

峯州刺史錢傳珣○案歐陽史職方志有封州而無峯州是書前後俱作峯州未知何據今仍其舊

以刑部員外封翹○翹原本訛堯今據封舜卿傳改正  
靈武節度使韓洙○韓洙原本作韓殊考其書韓遜傳  
洙即遜之子歐陽史雜傳亦作洙今改正

檢校尚書左僕射羅周敬○周敬原本作用敬考是書  
晉列傳作周敬歐陽史羅紹威傳亦作子周敬今改  
正

建徽吳越王錢鏐之將也○建徽原本訛作達徽今據  
十國春秋改正

賀瓌殺許州節度使謝彥章○案通鑑賀瓌密譖謝彥章于帝因與朱珏伏甲以殺彥章蓋密奉帝旨也是書及歐陽史五代春秋俱以賀瓌專殺為文未知孰是

制削奪兗州節度使張守進在身官爵仍命劉鄩領兵攻之○案是書守進歸晉本紀繫于五年三月張萬進傳作四年七月劉鄩傳仍作五年蓋守進潛附于晉在四年秋聲罪致討則五年春事也五代春秋以



守進叛為五年事歐陽史又以劉鄩討之為四年事  
不如是書之徵實